

摘藻堂四庫全書薈要

集部

欽定四庫全書薈要

聖祖仁皇帝御製文第二集卷十四目錄

勅諭

諭戶部

諭大學士伊桑阿阿蘭泰

諭大學士伊桑阿阿蘭泰

諭大學士伊桑阿阿蘭泰

諭大學士伊桑阿侍郎朱都納學士宋柱戶部

郎中鄂奇

諭大學士伊桑阿阿蘭泰

諭大學士伊桑阿阿蘭泰

諭內閣

諭大學士伊桑阿阿蘭泰張玉書學士戴通勒

德額赫里齊穡顧藻徐嘉炎陸某

諭大學士伊桑阿阿蘭泰張玉書學士戴通勒

德額赫里齊穡顧藻徐嘉炎陸某

諭大學士伊桑阿阿蘭泰張玉書學士戴通勒
德額赫里齊穡顧藻徐嘉炎陸某

諭大學士伊桑阿阿蘭泰張玉書學士戴通阿
爾裨顧藻徐嘉炎張榕端

諭內閣

諭吏兵二部

諭大學士伊桑阿阿蘭泰

諭大學士伊桑阿阿蘭泰學士戴通宋柱陶岱

齊穡博濟

諭大學士伊桑阿阿蘭泰王熙張玉書學士戴
通宋柱陶岱齊穡博濟韓炎顧藻徐嘉炎張
榕端

諭大學士伊桑阿阿蘭泰學士戴通宋柱陶岱
齊穡博濟

諭戶部

諭大學士阿蘭泰

諭戶部

諭大學士伊桑阿阿蘭泰王熙張玉書學士戴
通齊稽博濟傳繼祖韓炎顧藻徐嘉炎張榕
端

諭議政大臣

諭大學士伊桑阿阿蘭泰

諭大學士伊桑阿阿蘭泰

諭大學士伊桑阿阿蘭泰

諭大學士伊桑阿阿蘭泰

諭大學士伊桑阿阿蘭泰侍讀學士伊道

諭大學士伊桑阿阿蘭泰

諭大學士伊桑阿阿蘭泰尚書庫勒納佛倫薩

穆哈

諭內閣

諭大學士伊桑阿阿蘭泰

諭內閣

欽定四庫全書薈要卷一萬三千四十二

集部

聖祖仁皇帝御製文第二集卷十四

勅諭

諭戶部

頃緣山西巡撫噶爾圖同太原總兵周復興奏報平陽府地震房屋倒塌人民損傷隨經特遣司官星馳前往察勘情形比復傳問往來經過及本籍人員具述屋宇盡皆傾毀人口多被傷斃受災甚重朕心深切軫恤應

作何恩卹著速詳議具奏爾部即遵諭行特諭康熙三十四年四月二十五日

諭大學士伊桑阿阿蘭泰

爾等傳諭八旗滿洲蒙古都統官員子弟及諸有房舍者與家僕披甲者勿察若實無房舍之前鋒護軍披甲兵都統身自確察於此月初十日保奏康熙三十四年五月初五日

諭大學士伊桑阿阿蘭泰

覽八旗都統所察無房舍者七千有餘人未為甚多京師內城之地大臣庶官富家每造房舍輒兼數十貧人之產是以地漸狹隘若復歛取房舍以給無者所謂剗肉補瘡其何益之有貧乏兵丁僦屋以居損所食錢糧以償房租度日必至艱難於城之外按各旗方位河濱城下每旗各造屋二千間以給無屋兵丁每名給以二間於生計良有所益屋之外築以周牆沿河之牆各留礮眼如此既可美觀且足永固此屋令毋得擅鬻兵丁

亡退者則收之官大略計之約費三十餘萬金譬之國家建一大宮室耳勅下欽天監相視汝等及八旗都統身往驗看城下宜建造之處奏聞康熙三十四年五月初十日

諭大學士伊桑阿阿蘭泰

平陽府城垣樓堞衙署倉庫頃因地震悉皆傾圮異日所必修者今西安所貯銀兩多可發二十萬兩速令修葺及時營造城堞既可即完灾黎餬口亦資其益其下

工部具議以聞康熙三十四年五月二十八日

諭大學士伊桑阿侍郎朱都納學士宋柱戶部郎

中鄂奇

副都統齊蘭布等自盛京還奏言今歲盛京亢旱麥禾
不成米價翔貴雖市有鬻粟而窮兵力不能糴遂致重
困夫盛京者根本之地令朱都納宋柱鄂奇等馳驛迅
往會同盛京將軍副都統諸臣詳察果窮乏者於去歲
海運米二萬石中動支一萬石計會散給令可食至秋

成此一萬石散給而有餘者平價糶之若此則兵民均
有利益又諸地有告糧乏者遣城守尉部員之賢能者
併散給以賑之如一萬石不足散給發糶速具聞請旨
康熙三十四年五月二十九日

諭大學士伊桑阿阿蘭泰

城垣之下內外各旗空隙之地有可營建房屋者察看
奏聞八旗都統可速看本旗之地再會同驗看其令工
部遍傳八旗悉此康熙三十四年五月二十九日

諭大學士伊桑阿阿蘭泰

右衛將軍職任最為緊要須慎簡其人可斃命歸化城
將軍費揚古兼攝之待右衛將軍既得其人則可勿攝
其下兵部速行之康熙三十四年六月初四日

諭內閣

時值久雨連縣乍止復雨將不利於田稼朕甚憫焉亟
宜祈晴其傳諭禮部速議以聞康熙三十四年六月十
三日

諭大學士伊桑阿阿蘭泰張玉書學士戴通勒德

額赫里齊穡顧藻徐嘉炎陸某

江北糧艘狹小而所載糧數與他處之船相同船之所載既重不惟不能載貨而僅有令兼載他物其重困矣增置一二船可不勞而致也興永朝所條上十事亦曾言及於此爾等議以聞康熙三十四年六月十五日

諭大學士伊桑阿阿蘭泰張玉書學士戴通勒德

額赫里齊穡顧藻徐嘉炎陸某

近要兒渡決口及天津以南此二處其相視河之故道
可開河或達之海或達之大河者其識之於十月間奏
聞當遣人往視康熙三十四年六月十五日

諭大學士伊桑阿阿蘭泰張玉書學士戴通勒德
額赫里齊稽顧藻徐嘉炎陸業

沙河鞏化城盧溝橋拱極城灞上諸地馬坊城垣勅工
部察看於某地有可營建兵房若干間者同前造房事
併議以聞康熙三十四年六月十五日

諭大學士伊桑阿阿蘭泰張玉書學士戴通阿爾
裨顧藻徐嘉炎張榕端

茲後世職若以罪革斥其子勿准承襲令同父昆弟襲
之無同父昆弟者則宜削其職其下吏部定例具聞康
熙三十四年六月三十日

諭內閣

由天津再運米於盛京皆迅速而達大克濟夫厥事在
事官員人等悉議叙具奏來歲亦宜運米併議以聞康

熙三十四年七月十七日

諭吏兵二部

各省督撫提鎮官員間令來京陛見原欲以地方情形及兵民生計面加諮詢具有深意近見來京各官輒以進川馬等物為辭多所置辦雖經却還但恐其在任購買致貽地方官員兵民之累朕本欲詢兵民生計召令前來若反致累兵民殊失朕之初意且川馬如果需用朕自頒特旨令出產地方辦解何須進獻著通行嚴飭

嗣後一切禁止爾部即遵諭行特諭康熙三十四年七月二十二日

諭大學士伊桑阿阿蘭泰

馬之所係甚重宜於四十九旗諸地購買歸化城可千匹俄爾多斯可二千匹科爾沁可二千匹其餘諸旗定額購買爾等議以聞此買馬事遣部院中曾出差有生計者副以八旗蒙古護軍參領及參領侍衛各一人會同該王台吉等使傳諭朕旨購買之康熙三十四年七

月二十五日

諭大學士伊桑阿阿蘭泰學士戴通宋柱陶岱齊

稽博濟

領侍衛內大臣皆令與會議都統席特庫杜斯喀爾阿什坦胡巴齊什噶爾馬蘇努亦令與會議侍郎舊不與可已之康熙三十四年七月二十五日

諭大學士伊桑阿阿蘭泰王熙張玉書學士戴通宋柱陶岱齊稽博濟韓茨顧藻徐嘉炎張榕端

于成龍向以每事好勝倡議捐納革職今在河工殫極
勤勞居官素優總督原銜其復還之康熙三十四年八
月初二日

諭大學士伊桑阿阿蘭泰學士戴通宋柱陶岱齊
穡博濟

陝西永固城副將員缺令提督孫思克李林隆選擇奏
聞其選擇之員向經引見者則弗令其陞見若未經引
見者併人員咨送令其陞見如無可選擇者速牒該部

以應授之人奏聞康熙三十四年八月初二日

諭戶部

盛京地方比歲荒歉粒食艱難朕心深切軫念原欲躬親巡省詢問疾苦情形徧敷恩澤今雖停止東行而所
在貧窶兵丁尚冀朕之臨幸是宜仍加賑卹用俾資生
應作何加恩爾部議奏又盛京兵丁錢糧兩季支領兵
丁於未支領之際每致有稱貸逋負嗣後著按月支給
至今歲秋禾聞亦不甚豐茂恐生計漸艱困乏滋甚自

今冬以至來秋應作何賑給不致失所共計需糧若干
著盛京將軍副都統會同盛京戶部侍郎查明詳加籌
畫具奏爾部即遵諭行特諭康熙三十四年八月初三
日

諭大學士阿蘭泰

朕巡幸後蒙古事情爾須看過馳奏事皆共知之始克
有濟雖諸奏章亦必開看然後奏聞其當聞於皇太子
者爾即啓知康熙三十四年八月初四日

諭戶部

直隸順天保定河間永平四府所屬地方今歲水潦傷稼三農歉收朕巡幸所至徧加諮訪聞高阜之產尚有秋成而卑下之田被潦者多計所收穫不能相敵雖經勘災頒賑不致仳離失所而須辦錢糧若仍行徵取則民力匱乏難以輸將朕心深切不忍著將四府康熙三十五年地丁銀米全與蠲免用示寬恤其霸州雄縣香河寶坻四處皆有水道可以轉輸每處著發米一萬石

各差司官一員齎往照彼地時價減值發糶以資民食
著行文該撫通行曉諭俾均霑實惠副朕軫念災黎至
意爾部即遵諭行特諭康熙三十四年九月二十四日

諭大學士伊桑阿阿蘭泰王熙張玉書學士戴通
齊穡博濟傳繼祖韓茨顧藻徐嘉炎張榕端

各省操守清廉愛養百姓練達吏事之官不可謂無其
人其勅各省督撫以守廉愛民有幹濟之官自知縣以
上擇其可者各以一二入咨送到日奏聞引見康熙三

十四年九月三十日

諭議政大臣

伊拉固克三之徒衆有名目者諭令來京行後其屬役
及牲騎令兵丁陸續押赴徙於盛京令得飼養牲畜從
容以行其有流移者勿徙其家私付之該管札薩克喇
嘛又傳諭善木巴王墨爾根濟農王值雨雪時噶爾丹
侵掠其疆界亦未可定宜簡發其兵併附近喀爾喀諸
台吉之兵於諸處防守遠置塘哨偵探消息儻有噶爾

丹之傲來侵者敵勢寡弱量力可擊則以其兵擊之若敵勢衆多則設殿後之兵向歸化城內地移營雖退入內地亦不譴責也凡有動靜一面速報歸化城將軍一面奏聞康熙三十四年十月初八日

諭大學士伊桑阿阿蘭泰

八旗兵丁外大臣庶官及俊秀閑散人等現在京飼養之馬若干肥健者若干羸瘦者若干令各旗都統於各佐領內府佐領悉為察驗奏聞康熙三十四年十月十

五日

諭大學士伊桑阿阿蘭泰

各省向者欺隱之地畝曾限三年清出今限已將滿可再展限二年令其一一清出康熙三十四年十月十五日

諭大學士伊桑阿阿蘭泰

朕見各部院官冗事少其筆帖式有應裁者爾等會同各部院堂官稱事備員酌議裁減奏聞康熙三十四年

十月二十日

諭大學士伊桑阿阿蘭泰

八旗兵士以從軍被創而致殘疾者有能書寫及年力尚壯堪以筆帖式用者察奏以聞康熙三十四年十月二十日

諭大學士伊桑阿阿蘭泰侍讀學士伊道

車陳汗納木渣爾王等以兵追逐罕兜公此舉殊可嘉茲後遇事須殫力展効朕自厚與矜恤其傳諭朕意車

陳汗等勿以厄魯特為懼京師大兵及各路兵馬整備
已就若噶爾丹今冬蠢動定當咸劉無遺若噶爾丹過
此冬月苟延至於來春其殄滅可引領而待也可宣諭
使悉知之又喀爾喀巴爾瑚數百為羣肆行劫掠伊道
至日其以此信移檄科爾沁圖謝圖王達爾哈王等善
為防備車陳汗納木渣爾王車布登貝勒阿南達濟濃
此四旗之兵已經追逐罕兜公內大臣明珠等有用兵
之處此四旗其免調發又明珠等所往之地與爾等所

往之地相去非遙可互為通信其巴林之那木達克王
台吉阿拉布潭吳爾袞額駙等今在烏朱木親之地諭
令毋擅移居再探都統杜思哈爾及滿洲前鋒兵信息
馳報伊道此行宜善自防護惟以偵探信息奏聞為要
若遣多人往探徒爾勞疲人馬聞雪甚大雪所屆遠近
及某地可行某地不可行蒙古必知可問之蒙古遣人
往至哨瞭之所採取信息又爾於途次儻別得信亦即
報聞又喇席行止之地亦當互以音息相通康熙三十

四年十月二十三日

諭大學士伊桑阿阿蘭泰

張家口沿途驛遞俱已疲敝其遣兵部賢能司官前往
經理竝察其廢壞之由奏聞康熙三十四年十月二十
四日

諭大學士伊桑阿阿蘭泰尚書庫勒納佛倫薩穆
哈

軍行以馬為重今諸佐領所養官馬既皆給以錢糧飼

牧該管人員當不時嚴督務令肥澤若馬羸瘦無濟軍需佐領驍騎校護軍校撥什庫及養馬人員一併以軍法從事康熙三十四年十一月初一日

諭內閣

各部院滿漢大臣庶官以下筆帖式以上所養馬匹皆務肥澤儻令助馬以濟軍需則各以所助數目雖筆帖式亦身自上奏蓋為國家公事助以己馬即與其身赴行間効力者無異康熙三十四年十一月十一日

諭大學士伊桑阿阿蘭泰

朕見官兵戰箭皆以舊式製造短而且重皆與其所執之弓不稱弓之勁軟各異引弓之深淺不同科此後箭之長短重輕皆令度其弓力務製造合宜康熙三十四年十一月十二日

諭內閣

南路捕盜同知趙宏燮居官既優其父趙良棟向在行間著有勞勩趙宏燮其超擢為天津道康熙三十四年

十一月十八日

聖祖仁皇帝御製文第二集卷十四

欽定四庫全書薈要

聖祖仁皇帝御製文第二集卷十五目錄

勅諭

諭大學士伊桑阿阿蘭泰尚書馬奇侍郎思格
則阿爾裨學士宋柱齊稽傳繼祖綏色

諭大學士伊桑阿阿蘭泰尚書馬奇傳臘塔索
諾和圖納侍郎朱都納馬爾漢學士宋柱齊
稽傳繼祖綏色

諭大學士伊桑阿阿蘭泰

諭大學士伊桑阿阿蘭泰學士宋柱陶岱齊穡

綏色

諭大學士伊桑阿阿蘭泰兵部尚書索諾和侍

郎朱都納馬爾漢

諭大學士王熙等

諭大學士伊桑阿阿蘭泰

諭內閣

諭內大臣國舅佟國維等

諭內大臣國舅佟國維等

諭大學士伊桑阿阿蘭泰尚書馬奇佛倫索諾
和侍郎安布祿

諭大學士伊桑阿阿蘭泰尚書馬奇佛倫索諾
和侍郎安布祿

諭大學士伊桑阿阿蘭泰尚書馬奇佛倫索諾
和侍郎安布祿

諭大學士伊桑阿阿蘭泰尚書馬奇索諾和侍
郎安布祿學士綏色等

諭大學士阿蘭泰王熙張玉書李天馥學士三
寶楊舒朱都納哈山韓莢徐嘉炎張榕端

諭大學士伊桑阿阿蘭泰學士三寶楊舒朱都
納哈山哈雅爾圖倭倫

諭內閣

諭內閣

諭戶部

諭戶部

諭領侍衛內大臣索額圖明珠大學士伊桑阿

阿蘭泰

諭戶部

諭內閣

諭內閣

諭大學士伊桑阿阿蘭泰學士三寶羅察席爾

登

欽定四庫全書薈要卷一萬三千四十三

集部

聖祖仁皇帝御製文第二集卷十五

勅諭

諭大學士伊桑阿阿蘭泰尚書馬奇侍郎思格則
阿爾裨學士宋柱齊稽傳繼祖綏色

前遣喇西察巴林翁牛特克什克屯阿魯科爾沁六旗
貧乏者賑給米糧喇西未曾遍察近聞巴林等六旗貧
乏者不能聊生可速勅喇西令率司官筆帖式察明六

旗貧乏口數報之內大臣明珠明珠今事畢將返矣可
令以文書迎之於途明珠可留坡賴村監視散給汝等
同戶部理藩院會議以聞康熙三十四年十二月初八
日

諭大學士伊桑阿阿蘭泰尚書馬奇傳臘塔索諾
和圖納侍郎朱都納馬爾漢學士宋柱齊穡傳
繼祖綏色

革職及候缺官又進士舉人秀才監生俊秀無品級筆

帖式筦庫之士有願自脩馬匹牲口往軍前効力者凱
旋之日革職者以原職用候缺官及進士諸色人以應
陞之職先用若或被傷及陣亡者革職者以原品恩卹
議敘進士以下亦照職官一體恩卹議敘廢官中或年
老有疾不能身赴願以子弟代者亦照身赴例視其原
官給賞議敘復其原官勅兵部傳諭八旗及內府佐領
察前往効力人數具聞康熙三十四年十二月初十日

諭大學士伊桑阿阿蘭泰

西路師行後預備出征之王貝勒貝子公等酌量發往
歸化城屯守康熙三十四年十二月初十日

諭大學士伊桑阿阿蘭泰學士宋柱陶岱齊穡綏
色

雅克薩諸地夙產佳貂比年羅捕殆已至稀乏若以貂
不及格之故遂復治罪則官員徒爾受過佳貂實無可
得自茲以往額數既足以不及格之故免其處分其令
戶部理藩院內務府會同移文黑龍江將軍薩布蘇仍

令其定議具奏康熙三十四年十二月十九日

諭大學士伊桑阿阿蘭泰兵部尚書索諾和侍郎

朱都納馬爾漢

古北口總兵官李世達奏言身病不能前來今當軍興之際可陞石峽副將馬進良為古北口總兵官石峽副將以劉虎為之索額圖曾奏總兵官許盛年老有疾其令解任此缺陞通州副將白斌皆令於年內速赴新任白斌既到任可選其標下兵卒前赴軍中總兵官李世

達令養病來京病痊起用康熙三十四年十二月二十三日

諭大學士王熙等

朕自臨御以來日以愛養兵民為念未嘗輕於用兵遠事征討方今宇內固已無事惟厄魯特噶爾丹違背約誓恣行狂逞侵略我歸服之喀爾喀恐漸致邊民不得休息故特遣發各路大兵分道竝進務期剿蕩以為塞外民生除患向年烏瀾布通之役朕以策誘噶爾丹入

距京師僅七百里許大兵已經擊敗乃竟中賊計致噶爾丹遁走彼時朕躬偶爾違和未得親至其地失此機會至今猶憾噶爾丹竄伏巴顏烏喇地方相距未甚遼遠以是不憚勤勞親蒞邊外相機行事此賊既滅則中外寧謐可無他虞假使及今不除日後設防兵民益多擾累所奏已知之康熙三十五年正月二十四日

諭大學士伊桑阿阿蘭泰

江南浙江山東江西四省所製縣甲一有造竣者即接

續解京此額數之外再支正帑量其工力竭蹶製造於
三月初旬內可速送至特諭康熙三十五年正月二十
七日

諭內閣

通州至大通橋向無民船往來其有禁例乎今若令小
舟汎載似於民生殊有利濟可令戶工二部會同倉場
侍郎具議以聞康熙三十五年二月初四日

諭內大臣國舅佟國維等

喀爾喀王善木巴曾奏噶爾丹不可使久據克魯倫地方應速征剿而此次用師渠盡所有馬匹供我軍騎乘甚著勞績殊可嘉獎貝子盆蘇克聞韓都逃遁即遣人追捕此次用兵凡擒活口偵賊信亦懋著勤勞應將伊等敘功以示激勸議政諸臣會議具奏康熙三十五年六月初十日

諭內大臣國舅佟國維等

朕沿途觀閱邊內禾苗至佳邊外田莊聞五月內經霜

乃是重加播植者于成龍所運之糧供給兩路大兵餘者甚多曾諭于成龍云察罕腦兒等處前經種地造倉以貯米穀可即現有之倉運入收貯今應將此糧儲詳議其預籌之可令會議以聞康熙三十五年六月初十日

諭大學士伊桑阿阿蘭泰尚書馬奇佛倫索諾和侍郎安布祿

朕茲出師見察哈爾之軍人皆壯健効力為最其護軍

每月應加餉銀一兩至四十九旗士卒連年出征巡哨
往返勞苦每兵一名歲以六兩為率給與三年其會議
以聞康熙三十五年六月十一日

諭大學士伊桑阿阿蘭泰尚書馬奇佛倫索諾和
侍郎安布祿

將軍費揚古等疏稱右衛寧夏之兵皆自納喇忒地方
遣回矣朕思西路之糧不知運至何處軍士或致乏食
未可料也今選擇賢能司官二員如鍾神保者前往歸

化城令喇嘛及官員富戶等量出駱駝車輛運湖灘河
朔之米往迎而接濟之其會議以聞康熙三十五年六
月十一日

諭大學士伊桑阿阿蘭泰尚書馬奇佛倫索諾和
侍郎安布祿

軍士所乘出征馬匹到時監收仍給錢糧照常飼養缺
者毋令按補每佐領駱駝二隻馬或二十匹或三十匹
定數飼養凡有軍事可供需用為益良多至內廄發與

騎乘之馬到時亦俱交送內殿隱匿不交者亦或有之
著各都統嚴察令其盡數送入其會議以聞康熙三十
五年六月十一日

諭大學士伊桑阿阿蘭泰尚書馬奇索諾和侍郎
安布祿學士綏色等

聞西路之西安兵綠旗兵蒙古兵已遣回交與副都統
席爾哈達留住翁金地方今此兵曾否回汛及米糧曾
否接濟竝無奏報可令兵部理藩院選司官一員遣其

迅往寧夏歸化城確探兵至何地軍食接濟與否速行
奏聞康熙三十五年六月二十日

諭大學士阿蘭泰王熙張玉書李天馥學士三寶
楊舒朱都納哈山韓莢徐嘉炎張榕端

此次軍興宣化府大同府飼馬修路百姓勞苦至矣爾
等識之俟十月間啓奏以蠲來歲田租康熙三十五年
七月初六日

諭大學士伊桑阿阿蘭泰學士三寶楊舒朱都納

哈山哈雅爾圖倭倫

此次尾隨大兵所設驛站人員供應軍務並無貽誤今天氣漸寒而事已畢皆令撤回其中驛馬未經倒斃而全存者及有倒斃而賠補者皆議敘具奏倒斃而未補者并所斃馬數詳察奏聞其傳示兵部康熙三十五年八月二十日

諭內閣

今應移文諭知將軍薩布蘇伊軍士之糧已給至十月

初止若軍士率赴京師將馬匹飼養後遣則往返紆遠
將軍薩布蘇所統軍士可委賢能之人自塞外遣還薩
布蘇減省騎從親自來京若馬匹疲瘦軍士回汛維艱
薩布蘇可併率至京飼養然後遣往薩布蘇不必再為
請旨一面啓行一面奏聞可也康熙三十五年八月二
十三日

諭內閣

大將軍伯費揚古既駐師喀倫則安郡王可率軍士從

容牧馬而還員外郎色楞留於安郡王屯駐之地偵探
邊警康熙三十五年八月二十三日

諭戶部

宣化府錢糧前已屢經蠲免但比年以來所屬各州縣
牧養軍前需用馬匹又大兵絡繹往來各有支給經費
而供億甚繁殊勞民力朕巡幸經臨深切軫念著將康
熙三十六年宣化府屬地丁銀米全與蠲豁仍行文該
撫通行曉諭俾民間均霑實惠以副朕寬恤黎元至意

爾部即遵諭行特諭康熙三十五年九月二十三日

諭戶部

朕惟治天下之要惟以乂安民生為急顧欲安民生必
除寇虐欲除寇虐必事師旅方今寰宇承平人咸樂業
獨厄魯特噶爾丹狂逆邊塞荼毒生靈朕思為邊境人
民永絕後患故特遣發貔貅分道進剿朕躬不憚勤勞
以今歲春月親統中路大兵深入無水草之地直抵拖
諾比噶爾丹聞朕親臨盡棄輜重倉皇宵遁適與西路

大兵相遇大敗潰散俘獲其人口其寨桑等來歸甚衆而噶爾丹收殘賊千餘人仍竄伏於枯倫百爾齊爾等處地方朕因於冬月復統軍出邊相機剿撫行抵鄂爾多斯於是厄魯特人民來歸者絡繹相屬噶爾丹力窮勢蹙亦遣格壘沽英具奏乞降隨經頒示勅諭許其歸順惟是噶爾丹乃狡詐叵測之人其果否來降未可深信應仍厲兵秣馬待來歲出師撲剿務絕根株比年以來軍前需用馬匹在大同府屬牧養者甚多措辦草料

等項雖俱支用正項錢糧而供應浩繁殊勞民力但必此賊盡滅然後邊外蒙古賴以輯寧而在內生民亦獲休息師旅之興大非得已該郡官民尚各勉力急公勿以煩苦為慮朕茲從邊外迺蹕雲中深軫民力之艱用沛特恩以示寬恤康熙三十六年大同府屬州縣衛所應徵地丁銀米著全與蠲免俟噶爾丹殄滅之後朕自誕布德音渙敷休澤爾部即行文該撫通行曉諭俾咸悉朕惠愛黎元至意特諭康熙三十五年十二月初八

日

諭領侍衛內大臣索額圖明珠大學士伊桑阿阿

蘭泰

朕此次出師察獲回子汗阿卜都里徐特之子孫及阿爾虎林白克等之妻子今即速遣還之可馳諭川陝總督令回子汗阿卜都里徐特暫止還國俟此所獲伊等眷屬到時令其完聚偕往康熙三十五年十二月二十

五日

諭戶部

朕惟治安天下惟期民生得所而欲民生得所必以敷
恩寬賦為要朕於一切事務少有動用民力之處即厘
懷殷切刻不能忘比年以來因厄魯特噶爾丹狂逞逆
命遣發大兵分道進剿軍興供億不得已而煩民力甘
肅所屬各州縣衛所及榆林等處沿邊各州縣衛所適
當師行要道其喂養軍前需用馬匹至大兵往來經過
各項措辦雖俱支給正項錢糧而供應繁多閭閻勞苦

朕心深用軫念著將康熙三十六年甘肅巡撫所屬州縣衛所陝西巡撫所屬榆林等沿邊州縣衛所地丁銀米盡行蠲免行文各該撫徧加曉諭務俾小民均霑實惠稱朕體恤黎元至意甘肅所屬銀米既經全免需用錢糧著於鄰近省分作速撥給爾部即遵諭行特諭康熙三十五年十二月二十九日

諭內閣

黑龍江幾林烏喇地方頻歲不登可移文盛京將軍令


整繕船隻依前噶爾圖所運之例將盛京倉儲米穀以
彼地人力運五千石至莫爾渾伊屯之地積貯之康熙
三十五年十二月二十九日

諭內閣

今年自天津海運至盛京之米已給散科爾沁貧乏之
衆來歲仍當自天津運米至盛京其轉運船隻不必用
福建浙江二省者止用天津船隻輓輸一次足矣可諭
侍郎陶岱康熙三十五年十二月二十九日

諭大學士伊桑阿阿蘭泰學士三寶羅察席爾登
去歲霸州等處州縣曾運通州之米與被災百姓減價
平糶閭閻甚為得濟今年水災更甚應如去歲運米於
各州縣平糶可勅直隸巡撫沈朝聘何州何縣當運米
若干與民懋遷之其作速詳察即繕滿字摺子具奏毋
緩俟開印時也康熙三十五年十二月二十九日

聖祖仁皇帝御製文第二集卷十五



總校官庶吉士臣侍朝

校對官檢討臣郭寅

謄錄監生臣劉書

欽定四庫全書薈要

集部

聖祖仁皇帝御製文二集卷十

六至
八

詳校官原任編修臣徐立綱

欽定四庫全書薈要

聖祖仁皇帝御製文第二集卷十六目錄

勅諭

諭勇略將軍趙良棟

諭大學士伊桑阿等

諭吏部都察院

諭吏部等衙門

諭大學士伊桑阿阿蘭泰學士三寶楊舒羅察



席爾登

諭大學士伊桑阿阿蘭泰

諭提督江南學政學士張榕端提督浙江學政

侍講張希良

諭明史館監修大學士伊桑阿張玉書李天馥

吏部尚書熊賜履總裁戶部尚書陳廷敬禮

部尚書張英原任左都御史王鴻緒

諭內閣

諭宗人府禮部

諭兵部

諭大學士伊桑阿阿蘭泰

諭內閣

諭戶部

諭大學士伊桑阿阿蘭泰

諭方略館總裁大學士伊桑阿阿蘭泰王熙張
玉書李天馥吏部尚書熊賜履禮部尚書張

英

欽定四庫全書薈要卷一萬三千四十四

集部

聖祖仁皇帝御製文第二集卷十六

勅諭

諭勇略將軍趙良棟

頃尚書馬齊自寧夏回奏卿卧病不能動履用是深軫
朕懷念卿師旅舊勞諳悉邊務耆年里居正可時與諮
訪乃抱疴日久頤養為要特賜以人參鹿尾馳示存問
尚其善加調攝俾夙疾頓痊副朕眷注至意特諭康熙

三十六年正月十七日

諭大學士伊桑阿等

揚州淮安徐州等處被災錢糧該總督巡撫奏請蠲免
疏至即與全蠲康熙三十六年正月二十二日

諭吏部都察院

國家設立都御史及科道官員以建白為專責所以達
下情而祛壅蔽職任至重使言官果能奉法秉公實心
盡職則閭閻疾苦咸得上聞官吏貪邪皆可釐剔故廣

開言路為圖治第一要務近時言官條奏叅劾章疏寥
寥雖間有入告而深切時政從實直奏者甚少此豈委
任言路之初指乎自今以後凡事關國計民生及吏治
臧否但有確見即應指陳其所言可行與否裁酌自在
朝廷雖言有不當言官亦不坐罪自皇子諸王及內外
大臣官員有所為貪虐不法竝交相比附傾軋黨援理
應糾舉之事務必大破情面據實指叅勿得畏怯貴要
瞻徇容隱即朕躬有失亦宜進言朕決不加責其有懷

挾偏私借端傾陷者朕因言察情隱微自能洞悉凡屬
言官尚各精白乃心力矢忠讜以無負朕殷切責望至
意爾部院即傳諭行特諭康熙三十六年二月初四日
諭吏部等衙門

朕頃以狡寇噶爾丹未滅調度軍務親蒞塞外因念民
依巡歷邊境所至咨訪目擊山西陝西緣邊一路地皆
砂磧難事耕耘人多穴處類鮮恒業其土壤磽瘠固已
生計維艱而地方遼遠疾苦無由上聞大小官吏不能

子愛小民更恣橫索遂使閭井日漸虛耗比年用兵以
來一應軍需芻糗俱動支正項錢糧儲侍供應從不取
辦閭閻乃各府州縣官員借端私徵重收火耗督撫布
政使等官又不仰體朝廷恤民至意糾察貪汙禁革加
派反多瞻徇曲庇又或督撫庸懦懈弛因而筆帖式及
衙門人役無所忌憚擅作奸弊以致民生滋蹙朕心深
切軫惻今外寇已經蕩平惟以綏乂地方拊循百姓為
急務山陝兩省關係緊要應作何撫恤休養著九卿詹

事科道會同詳議具奏特諭康熙三十六年五月十九日

諭大學士伊桑阿阿蘭泰學士三寶楊舒羅察席

爾登

爾等可傳諭兵部選擇少壯而善馳騁者或司官或筆帖式一員馳驛速往山西巡撫倭倫處問伊招撫之事已經若何并沿途田禾及天時雨水協和與否詳閱以還康熙三十六年五月二十三日

諭大學士伊桑阿阿蘭泰

爾等傳諭工部或司官或筆帖式選善馳騁者一員馳
驛前往閱視黃河今年水勢若何河上工程若何興工
者何處明白閱視并諮詢河道總督而歸歸時沿途田
禾及雨水情形悉閱看以聞康熙三十六年六月初七
日

諭提督江南學政學士張榕端提督浙江學政侍
講張希良

自古帝王治天下率以興賢育才為首務稽察前制各省學政皆用詞臣董率之任至重也近來士習未變文事未彰良由督學各官不能仰體朕意茲特命爾前往江南浙江等處提督各府州縣學政爾尚端軌儀崇經術勤勸課嚴坊刻振維新之典革積衰之弊毋炫華而遺實毋避怨以市恩俾士有真材國收實用南土人文所萃尤宜加意作新多方鼓舞以稱朝廷培植人材至意所屬司道府州縣及提調等官凡關係學政者聽爾

據實考核及禮部題准申飭事宜俱當著實舉行向有傳諭嚴禁考試情弊爾當恪奉遵依至於本處督撫各有攸司不得互相干預如遇公事交接暨文移往來俱照平行其布按都三司接見禮儀往來文書有干係學政者俱照巡撫衙門例行爾受茲委任務嚴絕情面一秉虛公振拔孤寒澄汰汙賤教士有程取文有法俾士風不變時惟爾功如或蹈常襲故違命曠職亦惟爾罰爾其慎之故勅康熙三十六年六月十五日

諭明史館監修大學士伊桑阿張玉書李天馥吏
部尚書熊賜履總裁戶部尚書陳廷敬禮部尚
書張英原任左都御史王鴻緒

朕惟百禩之成模備於載籍而前代之信史定於興朝
故事具存允闡鉅典粵若有明受歷二百七十餘年其
間創守之規盛衰之勢人物之臧否制度之損益與夫
天官地輿兵刑食貨諸大政莫不散在簡冊歷歷可稽
顧歲月寢久聞見異辭附會既多錯迤益甚使非折衷

至當何以垂示來茲朕萬幾餘暇於有明實錄諸書屢
展披覽當洪永開國之際創業垂統綱舉目張立政建
官法良意美傳諸累葉雖中更多故而恪守祖制足以
自存又十六朝之內宮禁必嚴而女主不聞預政乾綱
獨御而權奸不敢上侵統論一代規模漢迄唐宋皆不
及也惟是晚近諸君生於深宮之中長於婦寺之手不
能接對羣臣巡省風俗以致民隱壅於上聞軍務日益
弛廢迨末季朋黨滋繁一時大小臣工悉固私交而行

欺罔遂使國是淆亂盜賊恣猖役重賦煩邊腹交困而
明祚馴至衰危矣直道在人公論難泯史書至重傳信
為宜朕數召儒臣面加訓諭自開局纂修以來歲久未
告竣事欲期速成宜專責成茲特命爾為監修總裁官
爾其董率分纂諸臣旁採舊聞時勤討論事當核實議
必持平毋膠已見而意涉偏私毋狃積習而語鄰矯激
務使褒貶適中是非有準綱立而條不紊言簡而事不
遺用成一代信史以副朕委任至意爾其勉之欽哉康

熙三十六年八月十四日

諭內閣

陝西山西兩省文官缺出可令吏部奏聞朕親選賢能者調補之康熙三十六年九月二十日

諭宗人府禮部

國家樂育人材振興文教將使海內英雋之士莫不蒸蒸蔚起矧宗室子弟繫託天潢豈無卓越之姿足稱令器允宜甄陶獎勵俾克有成考諸前史以公族應制舉

入仕者代不乏人今屬籍所載日益繁衍除已授爵秩人員外閑散子姓素無職業誠恐進取之途未闢嚮學之意漸墮嗣後八旗宗室子弟有能力學屬文奮志科目應令與滿洲諸生一體應試編號取中如此則賦質穎異者咸服習於詩書而學業成就者不阻抑於仕進凡屬宗支人人得以自効而於朕興賢睦族之至意亦用是以允愜焉爾等衙門即遵諭行特諭康熙三十六年九月二十八日

諭兵部

軍政大典五年一舉所以黜陟將弁砥礪官方使賢者知勸而不肖者知儆關係甚重每見督撫提鎮不能實心奉行輒向所屬需索部費恣意誅求因而將弁以下節次朘削重為兵害至於所舉所劾或瞻徇情面或曲庇私交扣剋額餉虛冒兵糧濫受餽遺虐取規利真正貪酷及衰懦闕冗不能騎射之員不行糾劾止將微員細事草率塞責以致貪酷庸劣之輩無所戒懲而守法

奉公宣勞盡職者遏抑不彰無所激勸殊負朝廷旌別
淑慝之至意爾部可即通行各省督撫提鎮這次舉行
軍政務矢公慎力破積弊俾舉一人衆皆以為賢劾一
人衆皆以為不肖庶激揚咸當而國家允收得人之效
儻因循陋習不加悛改後有發覺定將上官一併從重
治罪特諭康熙三十六年十月初十日

諭大學士伊桑阿阿蘭泰

去歲中路大兵遣車克楚祁薩穆往探噶爾丹營盤伊

等身抵其地偵視而歸因此曾將車克楚祁薩穆俱授
拖沙喇哈番之職與伊等同去之蒙古亦俱授以官職
矣但彼時未曾示諭該部今勅兵部議之并令移會吏
部康熙三十六年十月十二日

諭內閣

下河地方久罹水患朕心時切軫念前命挑濬白駒岡
門等口原欲使水盡通流田皆涸出今見興化泰州等
州縣積水尚多田仍淹沒民生甚屬苦累著行文總漕

總河親往會勘將下河積水何故壅塞不能迅流應作何盡令歸海涸出民田之處一一詳閱議奏康熙三十八年十月十五日

諭戶部

比年出師討寇總為中外生民永圖休息故不憚軍興征繕之煩遠歷邊塞其一切飛芻輓粟皆動支正供額賦不使累及閭閻獨是大兵牧養馬匹及三次師行出入皆經山西地方緣邊各州縣衛所固屬勉力急公其

餘諸郡雖非師旅所經亦有協辦轉輸行齎居送之事
又該省歲屢不登穀價翔貴民間生計甚屬艱難朕乘
輿頻臨目所親覩軫念殷切未嘗一日釋懷昨歲曾有
諭旨俟噶爾丹殄滅之後誕布德音渙敷庥澤今寇氛
盡滌邊境輯寧是宜格外加恩用綏黎庶康熙三十七
年山西通省地丁銀米著一槩蠲免爾部移文該撫令
遍飭所屬實心奉行家喻戶曉務俾深山窮谷均霑朝
廷德惠儻或借端征派澤不下究事覺定行從重治罪

爾部即遵諭行特諭康熙三十六年十月十五日

諭大學士伊桑阿阿蘭泰

右衛屯駐禁軍原因噶爾丹之事預為之備也今噶爾丹之事已畢此兵仍令全駐則供給芻秣轉運維艱可畱滿洲驍騎一千其蒙古分編佐領駐防之兵全行畱駐此外護軍及驍騎火器營兵俱應調回四十九旗之貧乏蒙古有令沿邊居住者俱察出遣至右衛歸隸蒙古佐領下作為甲士此駐防禁軍應即撤回抑候時氣

和暖後撤爾等與議政大臣會議以聞康熙三十六年十月十七日

諭方略館總裁大學士伊桑阿阿蘭泰王熙張玉書李天馥吏部尚書熊賜履禮部尚書張英

朕惟自古帝王御宇欲億兆永底於時雍必遐荒無間於聲教故攘外乃以安內盪寇斯可寧人理則相因事非得已我國家肇造區夏混一車書功業懋昭聲靈遐暢朕纘承丕基孜孜圖治惟期海宇嚮化使世登熙皞

時慶誠和乃厄魯特噶爾丹者恃其險遠輒肆跳梁藉
喀爾喀構怨為名擾我邊陲侵我內地屢經懲創而頑
黠不悛疊布恩施而負固自若朕思邊徼一日弗寧則
民生一日不靖與其每歲遠防曷若一勞永逸爰親總
六師三臨絕塞踰越險阻衝冒炎寒深入不毛之域直
窮大漠之鄉仰賴

天

地

祖宗之靈

社稷之福克殄巨憝掃清蟻聚寰海自此昇平人民得以休息是用益切勵精勤求化理而諸臣咸謂進剿機宜悉出朕躬指授一時稟命密議罕傳諸路行師勞心最久若非宣付史館無以垂信將來再四懇陳勉從所請於康熙三十六年八月二十二日開局纂修特命卿為總裁官卿其督率在館諸臣次第詮訂資衆手之編摩歲三征之令典豈曰鋪揚簡冊用張撻伐之威庶幾

昭示來茲不忘艱難之自卿其勉之欽哉故諭康熙三
十六年十二月二十二日

聖祖仁皇帝御製文第二集卷十六

欽定四庫全書薈要

聖祖仁皇帝御製文第二集卷十七目錄

勅諭

諭大學士伊桑阿阿蘭泰

諭內閣

諭內閣

諭內閣

諭大學士伊桑阿阿蘭泰尚書席爾達侍郎馬

爾漢覺羅三寶學士羅察布泰噶禮辛保溫

達

諭建威將軍宗室費揚古

諭清修禪師多綱喇嘛丹巴格隆

諭內閣

諭內閣

諭灌頂普慧宏善大國師扎薩克達喇嘛默爾

根綽爾濟

諭內閣

諭大學士伊桑阿阿蘭泰

諭大學士伊桑阿阿蘭泰王熙李天馥吳璥學

士布泰噶禮辛保溫達恩丕顧藻徐嘉炎李

錄予

諭大學士伊桑阿阿蘭泰王熙李天馥吳璥學

士布泰噶禮辛保溫達恩丕顧藻徐嘉炎李

錄予

諭大學士伊桑阿阿蘭泰

諭大學士伊桑阿阿蘭泰王熙李天馥吳璥學
士布泰噶禮溫達錢齊保恩不顧藻徐嘉炎

李錄子

諭內閣

諭內閣

諭內閣

諭戶部

諭吏戶兵工四部

欽定四庫全書薈要卷一萬三千四十五

集部

聖祖仁皇帝御製文第二集卷十七

勅諭

諭大學士伊桑阿阿蘭泰

厄魯特親王扎實巴圖爾等遣還時此處給與馬駝遣
司官送往總督吳赫速赴寧夏量撥馬駝俟伊等至寧
夏時即應付而遣之其自京師乘往寧夏之馬駝交與
送往之官於草生時在察罕拖海地方牧養數日從塞

外遊牧而來若草未生則暫於彼處飼之俟草生如意
牧養帶回特諭康熙三十七年正月二十五日

諭內閣

運往朝鮮國米石勅侍郎陶岱共運致三萬石以一萬
石賞賚朝鮮國以二萬石平糶特諭康熙三十七年正
月二十六日

諭內閣

遣戶部曾經保舉司官二員於被水災沿河之保定霸

州固安文安大城永清開州新安等州縣截留山東河南漕糧每處運致一萬石以備積貯米價騰貴時平值糴賣勅戶部速議具奏康熙三十七年二月二十五日

諭內閣

霸州新安等處此數年來水發時渾河之水與保定府南之河水常有泛漲旗下及民人莊田皆被淹沒詳詢其故蓋因保定府南之河水與渾河之水匯流於一處勢不能容以致汎濫此二河道著左都御史于成龍往

保定府南河著原任總督王新命往作何修治令其水
自分流詳看繪圖議奏今值農事方興不可用百姓之
力遣旗下丁壯備器械給以銀米令其修築伊等往時
部院衙門司官筆帖式酌量奏請帶往於十日之內即
令啓行康熙三十七年二月二十五日

諭大學士伊桑阿阿蘭泰尚書席爾達侍郎馬爾
漢覺羅三寶學士羅察布泰噶禮辛保溫達

今承平無事八旗佐領所飼馬匹每佐領或留六騎或

留七騎其餘以四月發往牧地於九月初旬仍復來京
每歲如此則錢糧既可節省而羸馬亦得以蘇息矣其
更代牧視每旗副都統一員參領二員量領官員兵丁
於水草佳處遊牧爾大學士等會同戶兵二部議奏康
熙三十七年三月二十五日

諭建威將軍宗室費揚古

北邊地方甚屬緊要茲命爾管領滿洲蒙古漢軍官兵
駐劄右衛兼管歸化城地方爾須甄別將領賢否申明

紀律操練士卒整飭器械一應錢糧草料等項會同巡撫及該道商確支給尤須加意嚴飭官兵不許倚勢橫行強奪市物操練新設蒙古兵丁使遵法紀不許將打草放馬為名侵擾民田務俾兵民和輯不得苦累地方歸化城乃邊外各部落扎薩克總要之地見在雖有土墨忒兩旗官員兵丁但隊伍紀律素不嚴整今又增蒙古兵甚多爾總率兩旗都統副都統不時訓練革除積弊勸課耕種廣儲糧糗如遇內外邊境有賊寇消息即

與副都統竝歸化城都統副都統等計議一面奏聞一面率領官兵奮勇剿除毋致滋蔓其有需用綠旗官兵之處大同宣府綠旗官兵聽爾酌量調遣凡勅中開載未盡事宜俱與副都統歸化城都統副都統等同心計議相機施行勿致失悞不得執拗虛憍有妨事務凡錢穀詞訟民間一應事情俱屬地方官管理不得干預爾受茲重任須殫竭忠悃宣布德威弭盜安民方稱委任如或貪黷乖張縱兵擾民貽悞重地責有所歸爾其慎

之故諭康熙三十七年四月十七日

諭清修禪師都綱喇嘛丹巴格隆

朕惟佛氏之教以空寂為宗以慈悲為用上翊皇度下
濟民生其徒有能闡揚其教者朝廷必嘉與之爾丹巴
格隆夙承梵教恪守清規領眾虔修以祝庥祉深可嘉
尚茲授爾為清修禪師仍提督喇嘛僧眾朝夕讚宣菩
薩頂真容院乃五臺山名勝之地清淨之所凡一應軍
民人等毋令騷擾爾尚益勉進修用弘慈化丕振宗風

以副朕褒獎之意欽哉故諭康熙三十七年四月二十
二日

諭內閣

覽科道衙門月終註銷案件但奏稱無違限之事而事
務若干件於幾日完結竝未開載此後應將事件數目
竝完結日期於疏內詳列具奏康熙三十七年五月十
七日

諭內閣

烏喇寧古塔幾林烏喇黑龍江等處新滿洲內曾授官
職以老病解任者照其原官品級給俸祿以養贍之矣
此等解任之官令其子弟承替則供職得人而俸祿亦
不致虛糜其勅兵部逐一詳察具奏康熙三十七年五
月二十一日

諭灌頂普慧宏善大國師扎薩克達喇嘛默爾根

綽爾濟

朕惟佛氏之道清淨慈悲西土之人崇信已久其徒有

能敷揚遺教者國家亦因而嘉與之爾默爾根綽爾濟
始居邊剎來住都城精持戒律為國祝釐歷有年所茲
授爾為灌頂普慧宏善大國師爾尚率在京宏仁寺比
丘虔修淨業仍攝西寧宏善寺徒衆恪稟清規庶無負
朕褒獎之意欽哉故諭康熙三十七年六月初四日

諭內閣

朕巡省盛京車駕既發之後副都統吳達禪到日令其
馳赴行在已有諭旨矣其餘大臣庶官奉差回時不必

前來又各處赴京陞見臣工如有應俟啓奏之事令其
暫候如無事待奏其各回本任康熙三十七年七月二
十六日

諭大學士伊桑阿阿蘭泰

今叛逆噶爾丹骸骨已經搜獲不日解至而遺孽就俘
亦拘繫在此應如何處置爾等會同議政大臣滿漢九
卿詰朝集議以聞康熙三十七年七月二十七日

諭大學士伊桑阿阿蘭泰王熙李天馥吳璥學士

布泰噶禮辛保溫達恩不顧藻徐嘉炎李錄予
爾等移文奉差茶馬官所易之馬豫備三千匹可遣理
藩院戶兵二部賢能司官各一員前往於來年四月間
青草甫長之時取道塞外解送京師康熙三十七年十
一月十五日

諭大學士伊桑阿阿蘭泰王熙李天馥吳璥學士
布泰噶禮辛保溫達恩不顧藻徐嘉炎李錄予
開濬下河民生攸繫朕為閭閻疾苦深切軫念曾命凱

音布孫在豐于成龍王新命等專司開濬伊等俱奏工程告竣民生大蒙利益載在冊籍存部可考人亦具在可以質詢也由今觀之止是虛糜國帑水勢並未消滅田畝並未涸出所謂有益民生者果何在耶今桑格又奏當行開濬而九卿並不詳詰從前開濬諸人亦不稽考冊籍遽議准行如果此次開濬巨浸全消疆理盡復民業得濟朕於錢糧絕無吝惜即動發帑金令其興工而已至捐助事例並不宜允行即今山陝所捐銀米其

事尚未明晰也若下河果如其所請疏鑿開濬而桑格等能必水即消田即出有裨於民以身家保奏則即令開濬之御史吳甫生亦以此事條奏所言甚是可將其疏并發九卿詳詢前次督濬者復稽考諸冊籍然後確議以聞康熙三十七年十一月十五日

諭大學士伊桑阿阿蘭泰

朕觀部院官員自論俸補授以來久未察劾以致年齒衰邁才力不及者甚多可令各部院衙門察其年老才

卷十
劣并行止乖亂者叅奏將所叅之人引見焉康熙三十
七年十一月二十二日

諭大學士伊桑阿阿蘭泰王熙李天馥吳璵學士

布泰噶禮溫達錢齊保恩丕顧藻徐嘉炎李錄

予

今時際隆冬正當水涸而董安國乃奏水長朕觀其所
奏諸事皆於河道水性罔協其宜殊不稱職著革任于
成龍原任河道總督今河上工程皆其未完之事其下

効力之人亦衆此缺著將于成龍補授速召來京陛見
詳議河務令其馳驛赴任董安國未完各項錢糧及修
築工程皆逐一交明于成龍可傳諭九卿知之康熙三
十七年十一月二十七日

諭內閣

河務緊要董安國修築工程繁多恐致與于成龍等彼
此推諉可遣部院堂官一員并率賢能司官前往會同
漕督桑格將已完未完之工并所用錢糧數目逐一詳

明察文細造清冊齎來康熙三十七年十二月初一日

諭內閣

緣事婦人拘喚至部院衙門對簿鞫問於理未協朕因此故曾屢次頒發諭旨今見因事牽連之婦人仍有拘至公庭質訊者嗣後除婦人親身犯罪外無論官員民人之妻有事屬牽連應行質訊之處可遣司官筆帖式往其家問取口詞其拘至公庭永行停止康熙三十七年十二月初十日

諭內閣

今觀部院司官竝未親筆撰稿皆委筆帖式為之堂官亦不加看閱即行啓奏是以兵部補授參將之疏中有舛錯良由此故嗣後朕不時傳部院司官令其撰作看語親加試閱若不能撰者不止將司官議罪即堂官亦竝加處分所以預為曉諭也可遍傳部院衙門知之康熙三十七年十二月十一日

諭戶部

淮安揚州鳳陽等處比年水患頻仍浸漫隄岸田多淹
沒耕獲無從百姓艱於粒食經朕時加軫恤屢賑屢蠲
被災地方賴以安堵但念久歉之餘恐致資生匱乏朕
廑憫殷切未嘗稍釋於懷前此雖頻敷庥澤至再至三
用裨羣黎生計猶恐開春東作農事艱難若不大沛恩
施安能令小民各得其所著將海州山陽安東鹽城高
郵泰州江都興化寶應壽州泗州亳州鳳陽臨淮懷遠
五河虹縣蒙城盱眙靈璧等州縣并被災各衛所康熙

三十八年一切地丁銀米等項及漕糧盡行蠲免務使民間均霑實惠以副朕體恤元元生息愛養至意爾部即遵諭行特諭康熙三十七年十二月二十五日

諭吏戶兵工四部

朕撫馭寰區乂安中外孜孜圖治宵旰勤民期於天下咸遂生成物無不得其所今邊烽永靖四方無事獨是黃淮為患衝決時聞下河地方田廬漂沒朕軫念民艱曩曾屢遣大臣往令督理不惜數百萬帑金務期早綏

黎庶乃歷年已久迄無成功今水勢仍復橫溢浸漫城
閭沉沒隴畝以致民多失業董其役者未有上策可以
宜民時廩朕懷未嘗少釋在內諸臣咸請朕親臨指示
以為一勞永逸之圖方今春時雨水減少正宜講求疏
濬以遂安瀾爰諏吉南巡親加勘閱更以吳地乃東南
奧壤襟帶江湖勵俗省耕兼行臨視凡一切往返供億
已皆俾辦於京師即途次日用所須亦令各衙門照本
地時值採買摠於民間一無所累仍恐沿途官吏藉名

科派致累閭閻故特頒諭嚴行申飭如有悖旨假託派
索者察實即以軍法從事該地方大小文武官員不許
與扈從官員藉稱親舊擅相餽遺違者與受人員竝以
軍法從事其護從大小官員隨行僉從人等如有橫行
生事者一併從重治罪凡經過地方百姓各安生業皆
如常時務令廛無廢市隴不輟耕毋得惶遽引避其軍
民人等懷挾私怨受人指使擅於駐蹕處所輒行告訐
者一槩嚴禁不准仍照衝突儀仗例嚴加治罪爾部即

傳諭扈從大小官員人等併行各該督撫於各府州縣
城市鄉村遍張告示備行曉諭務令億兆通知以副朕
體恤惠愛至意特諭康熙三十八年正月二十一日

聖祖仁皇帝御製文第二集卷十七

欽定四庫全書薈要

聖祖仁皇帝御製文第二集卷十八目錄

勅諭

諭戶部

諭總督于成龍

諭刑部

諭戶部

諭吏部

諭吏戶兵三部

諭戶部

諭刑部

諭吏部

諭戶部

諭戶禮二部

諭戶部

諭戶部

諭內閣九卿詹事科道

諭戶部

諭戶部

諭吏部

諭戶部

諭戶部

欽定四庫全書薈要卷一萬三千四十六

集部

聖祖仁皇帝御製文第二集卷十八

勅諭

諭戶部

朕君臨天下期於黎民樂業各獲其所凡興利除害之事靡不舉行蠲免賑濟之恩靡不下逮比年以來因淮揚所屬地方疊罹水患業已歲蠲額賦賑恤頻施又動支數百萬帑金責令在河諸臣於應挑應築之處酌量

修理務使汎濫之水匯歸入海被淹之廬舍田畝盡皆
涸出用底幹寧乃錢糧竟爾虛費卒不能使積淹有歸
田廬未涸民生未遂朕聞之惻然軫懷值茲四方無事
之時欲將一切修舉事宜詳閱指示用是躬親臨幸沿
途審視黃河水勢咨訪地方父老比至歸仁堤高家堰
量度地形高下應挑應築一一明示河臣惟是被淹地
方米價騰涌生計維艱朕目擊民依深用厪念著將漕
糧截畱十萬石於高郵寶應興化泰州鹽城山陽江都

受災七州縣各畱一萬石悉較時價減值發糶餘米三萬石著於邳州畱八千石宿遷桃源清河安東四縣各畱五千五百石亦較時價減糶此各州縣發糶之米著就道交與漕運總督河道總督邳州著遣司官一員前往監視再截畱米十萬石於揚州淮安各收貯五萬石這應畱漕糧不論何處米石著就近截畱爾部即遵諭行康熙三十八年三月初七日

諭總督于成龍

初六日在清水潭九里地方試水平測量河水高湖水二尺三寸九分此一帶攬湖之石堤甚為緊要理應速行修造朕在此親自步行看驗修理河工官員不見一人理應行查即參至高郵州地方看得河水向湖內流河水似高一尺有餘趣黃河之水未深之時此等堤岸即一丈之地不可不緊急修理為此特諭康熙三十八年三月初七日

諭刑部

朕愛養民生慎重刑獄凡有奏讞時示矜全茲鑒輿南
巡見沿途老稚男婦環跪歡迎心甚嘉悅念此編氓皆
吾赤子原期生聚教訓共底善良其或陷於刑章致因
囹圄改過無路惻然傷之所經過山東江南兩省見在
監禁人犯除十惡真正死罪及詔欸不赦等罪竝官吏
犯贓不宥外其餘自康熙三十八年三月十五日以前
死罪及軍流徒罪以下已結未結俱著寬釋此朝廷巡
幸所至欲使竝生之至意可通行曉諭令咸悉朕懷爾

部即遵諭行特諭康熙三十八年三月十三日

諭戶部

東南為財賦重地朕時加軫念頻歲以來雖在邊塞用兵之際未嘗不早夜殷殷睠懷寬恤茲以中外昇平特事巡省並閱河工比至江南親察民間饒瘠之狀見淮南北地方疊罹水患深用惻然已經屢蠲屢賑仍命截留漕糧減價平糶其餘各州縣固市肆安輯耕鑿恬熙而額賦浩繁民生拮据歷年逋負積算日增合行江蘇

巡撫安徽巡撫所屬舊欠帶徵錢糧計及百萬念小民

方供新稅復急舊逋物力維艱勢難兼辦里井既多催

科之擾官吏復滋叅罰之煩應沛特恩槩行蠲豁除康

熙三十三年恩詔內已經赦免外其三十四五六年奏

銷未完民欠一應地丁錢糧米豆麥雜稅爾部行文該

督撫察明俱著免徵務飭有司悉心奉行俾使窮簷部

屋均霑實惠如有已徵在官詭稱民欠希圖侵蝕肥己

者一經發覺定從重治罪朕身處宮禁與巡歷方隅無

非孳孳民事但使閭閻豐足則國家裨益良多以此不
惜蠲除頻敷德澤凡厥官吏軍民宜咸知朕意爾部即
遵諭行特諭康熙三十八年三月十三日

諭吏部

朕以勤求民隱閱視河工特舉鑾輿巡省一切供御之
費皆自內庭儲侍不下煩於有司而經過山東江南地
方各官備辦夫船等項効力殊屬勤勞此等官員有因
公註誤罰俸住俸降俸降級革職畱任者著察明悉從

寬免爾部即遵諭行康熙三十八年三月十九日

諭吏戶兵三部

朕矐念東南民生風俗特行巡省兼以黃淮為患親閱
河工比巡歷堤堰詳加相度以疏導修築之法指授河
臣刻期興作隨南涉江表徧察民依頃至蘇州府駐蹕
有浙江文武官吏及在籍官員迎謁於行在言浙民望
幸之心至殷且切合詞諄懇不啻再三朕勉徇輿情揚
旌前發以三月十九日啓行自出京師以來一切供御

之需皆出儲備其沿途日用令該衙門照各地方時價採辦一無所累於民如有官吏借名科派致擾閭閻者察實以軍法從事地方大小文武官員與扈從官員借稱親舊私相餽遺與受之人及扈從大小官員隨從人等有橫行生事者一並軍法從事凡經過地方百姓各安生業皆如常時務令廛無廢市隴不輟耕毋得違遽引避方今正屆農時所過田畝勿令踐踏其軍民人等懷挾私怨受人指使擅於駐蹕處所輒行告訐者一槩

嚴禁不准仍照衝突儀仗例嚴加治罪爾部即傳諭扈從大小官員人等併行該督撫於各府州縣城市鄉村徧張告示悉行曉諭務令億兆通知以副朕體恤惠愛至意特諭康熙三十八年三月十九日

諭戶部

朕因淮揚地方數被水患躬臨巡省目擊田廬淪沒之苦深加軫恤既截留漕糧以濟民生仍蠲除積欠以紓民困其昨歲淮揚兩屬被災錢糧曾經該督撫具題部

議照例減免三分今念百姓餬口維艱安能辦賦應破

常格用沛特恩淮安府屬海州山陽安東鹽城揚州府
屬高郵泰州江都興化寶應九州縣並淮安大河二衛
康熙三十七年未完地丁漕項等銀一十九萬有奇米
麥十一萬石有奇著全與蠲免爾部行文該督撫卽飭
各州縣張示曉諭務體朕憫惻羣黎之至意俾窮鄉僻
壤均霑實惠如有不肖官吏私徵侵蝕者察出定治重
罪特諭康熙三十八年三月二十二日

諭刑部

朕巡視東南行次浙省因官吏軍民依戀誠懇特畱蹕數日以慰喁喁奏請之情獨念獲罪人犯身淹刑獄一干法網無由自新茲乘輿經臨惻然矜憫用沛好生之澤聿示格外之仁該省各屬地方有罪犯現在監禁者除十惡等真正死罪及詔欸不赦等罪與官吏犯贓不宥外其餘自三十八年三月二十六日以前死罪以下已結未結悉著寬釋夫省刑宥罪者朝廷之殊恩守身

奉法者小民之常分必使黎庶嚮風咸知寡過期稱朕
孳孳教育羣生至意可行文該督撫徧傳所屬張示曉
諭爾部即遵諭行特諭康熙三十八年三月二十六日

諭吏部

朕頃自江南巡歷浙省沿途供御悉經儲備不以纖毫
取辦閭閻而地方官料理夫船等項一無缺悞殊屬勤
勞此等官員有因公註誤罰俸住俸降俸降級革職畱
任者著察明悉從寬免爾部即遵諭行特諭康熙三十

八年三月二十六日

諭戶部

朕以省方問俗巡歷三吳比至浙省見緣路農桑固徧隴畝而地有肥磽時有豐歉歷年正供錢糧因輸納維艱致多逋負雖已准分年帶徵而新舊之賦取給於一時恐力作之民終難於兼辦應通行蠲豁以弘庥澤除康熙三十三年以前恩詔赦免外其三十四五六年奏銷未完民欠地丁錢糧米豆麥雜稅著一槩免徵爾部

行文該督撫責令有司悉心奉行務俾均霑實惠如有
官吏以完作欠詭詞侵蝕者察出定從重治罪夫朝廷
頻賜田租所以優恤民力誠使閭里之間人敦本業家
有餘儲則藏富在民朕深嘉賴可傳示官吏軍民人等
令咸知悉爾部即遵諭行特諭康熙三十八年三月二
十六日

諭戶禮二部

朕子育黎元勤求治理日孜孜以施德澤厚民生為急

務而江浙二省尤東南要地朕時切軫念比歲以來蠲
豁田賦賑濟凶荒有請必行無災不卹雖漕項錢糧向
未蠲免者亦曾特旨蠲免愛養之道備極周詳庶幾民
生日益康阜用是乘輿時邁於視河事竣巡歷江浙咨
訪民間情形見淮揚一路既困潦災而他所過州縣察
其耕獲之盈虛市廛之膏腴絀視十年以前實為不及此
皆由地方有司奉行不善不能使實惠及民所以小民
雖懷愛戴之誠而朝廷恩澤卒未下究朕目擊廛懷亟

思拯卹截留漕糧寬免積欠另有諭旨惟各鹽差關差
向因軍需繁費於正額外令在差官員以所私得贏餘
交納充用今思各官孰肯自捐私橐勢必仍行苛取商
瘠民困均坐此弊著將加增銀兩一槩停罷以紓商民
之累其兩淮鹽課康熙三十六年曾加增四十萬兩今
恐商人辦課維艱有漸致匱乏者著減去二十萬兩此
外有應行應革事宜朕還都以後仍加商確次第舉行
該督撫藩臬皆地方大吏亦著悉心體訪凡有可為民

興利除害者作速勘實陳奏嚴革雜派禁止刁訟然後
胥吏不能作奸良民得以安業儻官更有悖旨妄行者
許商民首告該督撫察出即行參奏朕視民如傷惟恐
一夫不獲其所茲值海寓昇平兵革不事正當與民休
息之時故特渙沛德音減徵寬稅以為閭閻留有餘之
力萬一嗣後別有急需或不得已而稍議加增想在小
民亦能共諒朕懷輸將之恐後也至於江南浙江人文
稱盛入學名數前已酌定增額今著於府學大學中學

小學各增五名舉行一次以示獎勵人才至意爾部即
遵諭行特諭康熙三十八年四月初二日

諭戶部

朕巡幸江南遍察地方疾苦深知民間生計艱難故將
通省積欠錢糧盡行蠲免所過州縣有被災甚重者俱
經拯濟務俾得所茲聞鳳陽府屬去歲潦災甚重是用
破格加恩以示優恤康熙三十七年該府屬壽州泗州
亳州鳳陽臨淮懷遠五河虹縣蒙城盱眙靈璧十一州

縣立泗州一衛未完地丁漕項等銀米著一槩免徵爾
部行文該督撫卽飭該地方有司張示曉諭令窮鄉僻
壤咸悉朝廷曲軫災黎之至意如有不肖官吏悖旨私
徵使百姓不沾實惠者察出定治重罪爾部卽遵諭行
特諭康熙三十八年四月十六日

諭戶部

朕巡省民生風俗南至於江浙茲以返蹕行經山東緣
途延見父老諮詢農事幸今歲雨暘時若二麥繼登小

民可以無憂粒食但前年被災泰安等二十七州縣生計尚未豐盈宜更加恩休養所有康熙三十六年未完地丁銀米俱著免徵其三十七年應徵錢糧原因災傷令於三十八年完納今念一歲之內竝輸二歲之租恐物力艱難未能兼辦著分作三年帶徵以示寬恤爾部移文該撫轉飭有司明白張示務使窮鄉僻壤均沾實惠以無負朝廷曲軫民依至意儻有不肖官吏私徵侵蝕致上澤不下及者察出定治重罪爾部即遵諭行特

諭康熙三十八年五月初六日

諭內閣九卿詹事科道

朕南巡至浙江見百姓生計大不如前歷年來屢將舊欠錢糧盡行豁免其被災地方槩行賑濟恩澤屢加在百姓應比往年豐足今反不及從前富庶皆因府州縣官剝削人民多派侵取餽送上司或有沽名不受餽送而因事借端索取更甚凡有微小易結應審之事牽連多人遲延索詐者甚多此等情由在京官員亦有所聞

而九卿科道無有不知其督撫不將此等情弊釐剔察
叅反將行賄官員薦舉廉正官員糾劾以致民生失所
殊失朕愛養元元之至意且畿輔近地因朕不時巡察
直隸地方竟無私派侵取情弊故人不知有私派之苦
其各省督撫若體朕愛民至意實力奉行或有不肖劣
員若科道不畏人不徇情察訪糾叅則有司何敢復行
私派侵取今作何令吏治澄清萬民樂業共享太平熙
皞之治爾部會同確議具奏特諭康熙三十八年五月

十八日

諭戶部

朕思小民生計惟農畝是賴必年穀收成斯衣食無缺
淮揚所屬海州等州縣衛接年河流浸漫田廬編氓艱
於粒食朕心深切軫念已將康熙三十八年錢糧俱行
蠲免今春南巡目覩民間疾苦恐致失所復將康熙三
十七年未完錢糧盡與豁除諭令所司將沿河堤岸堅
固修築乃修防未竣夏秋又致沖決田廬盡沒水中特

命該撫往駐被災地方動支積貯米穀並將漕糧截留
親行賑給今念清口河流未通民田仍遭淹沒耕獲無
從百姓餽粥尚且艱難來年租賦安能輸辦著將這被
災海州山陽安東鹽城大河衛高郵泰州江都興化寶
應等州縣衛康熙三十九年地丁銀米等項及漕糧漕
項銀兩盡行蠲免爾部速令該督撫通行曉諭務俾均
霑實惠以副朕拯卹災黎至意如有不肖官役朦混侵
冒仍行私徵者該督撫嚴察指參從重治罪爾部即遵

諭行特諭康熙三十八年十一月初五日

諭戶部

朕君臨天下撫馭兆人無日不以休養生息為念嘉與
元元共圖豐樂蠲租賜復時切於懷故從前於直隸各
省權其緩急先後頻渙恩施今海宇昇平四方無事欲
使普天率土咸登阜饒惟湖南地方素稱魚米之鄉比
年雖年穀順成而民間猶未盡充裕是用格外加恩以
綏黎庶所有康熙三十九年湖南通省地丁雜稅等項

錢糧著一槩蠲免爾部移文該督撫令徧飭所屬實心
奉行家諭戶曉務俾深山窮谷均霑朝廷德惠以副朕
愛民如子至意儻或借端徵派澤不下究事覺定行從
重治罪爾部即遵諭行特諭康熙三十八年十一月初
八日

諭吏部

凡奉差遣官員理宜恪慎潔已辦理公務事竣即遄旋
復命庶不負委任之意嗣後如巡鹽權稅審事察荒及

一應差遣併部委各項官員儻有沿途騷擾需索繞道
妄行或公務已畢仍逗留地方借端生事恣意亂行或
將所帶筆帖式撥什庫人等私自遣往他處督撫係簡
任封疆大臣著即指名參奏以憑究治如督撫瞻徇容
隱不行糾參事情發覺將督撫一併議處爾部即遵諭
行特諭康熙三十八年十二月初九日

諭戶部

淮揚等處百姓頻年罹於水災未寧幹止朕心時切軫

念比歲以來多方優恤蠲免賑給靡不舉行去年春朕親履河干目擊小民田廬皆被滄沒災黎艱於粒食益為憫惻於懷爰命地方官按戶賑濟又將截留漕糧發賑平糶俾得贍養上下兩隄岸前雖屢發帑金修築迄無裨益去年二月面諭河工諸臣速行修治至今尚無成效復遴選廷臣同往經理無非軫懷民瘼欲令黃運兩河隄岸速成斯民早安生業耳念水患一日不除則百姓一日不得耕種用是深以為慮著將今年漕糧截

留二十萬石存貯淮揚地方備用爾部即遵諭行特諭
康熙三十九年三月初二日

諭戶部

國家要務莫如貴粟重農朕宵旰圖治念切民生惟期
年穀順成積貯饒裕於以休養黎元咸登樂利今聞直
隸各省雨澤以時秋成大熟當此豐收之時正當以饑
饉為念誠恐歲稔穀賤小民罔知愛惜粒米狼戾以致
家無儲蓄一遇歲歉遂至仳離著該督撫嚴飭地方有

司勸諭民間撙節煩費加意積貯務使蓋藏有餘閭閻
充裕以副朕重農敦本愛養元元至意爾部即遵諭行
特諭康熙三十九年七月二十五日

聖祖仁皇帝御製文第二集卷十八



總校官庶吉士臣侍朝

校對官檢討臣郭寅

膳錄監生臣劉書